

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sentsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

³ Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama.

⁴ Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá.

⁵ Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

Nýe canýe ndegombre buayenana soyënga Cristbiana endmëna

⁶ Atšbe ainanoca inýetsá šontsebiona, er nda nanjouena, tšëngaftanga nýe baseftayshinýe y ya juabna šmojatstrocá y Bëngbe Bëtsá stëtšoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Cristbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtšoye šmojtsequedá, ínýengbe buayenana soye jouenama, y chë ínýenga jtsichámuana chë buayenana soyënga chë tšabe noticiënga canmëna ca.

⁷ Ndegombre, ndoñe quenátsmëna inýe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentše, ba ndegombre soyënga jtsejuánama, inýe soyënga jacjayama.

⁸ Nderado bënga o canýe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiana ¡Bëngbe Bëtsá chaoma infiernoca becá chaosufrima!

⁹ Tempo ya chca sënjánayana; mora cachiñe šcutétayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiana chaoma infiernoca puerte chaosufrima!

¹⁰ Atše chca stjayana ora, ¿tšëngaftanga

cmojtsinyana atše soyënga stsama entšanga oyejuayënga átšeftaca chamotsemnana? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnana. Entšanga oyejuayënga chamotsemnana, atše cabá soyënga stsamëse, atše ya ndoñe Cristbe canyë oservená stsemna.

Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnana

11 Atše sëntseboše tšëngaftanga, Jesucristbeyeca atšbe catsátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama.

12 Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninyé.

13 Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchemá.

14 Atše inyë judiënga cach atšcá uata bomnëngbiana más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nyets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá.

15 Pero Bëngbe Bëtsá atšbe tšabiama yojanjuabná, y chíyeca, atše cabá ndonýna ora, canýe bëts soyama cha šojanbocacá.

16 Y cha tojánbošena ora, šonjaninýinýé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama;

17 y Jerusalenoye cach ndoñe chiyataná chë atšbiama más natsana Jesucristbe ichmónënga imojamnëngaftaca jencuëntama. Chamna, cachora Arabia uabaina luaroye sëntsanofne, y chentšana Damasco bëts puebloye sëntaná.

18 Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuëntama, y cháftaca nýe uta semana sënjëftsemna.

19 Y ndocna chë Jesucristbe inýe ichmónënga chiyáisananye; nýe Santiago aíñe, Bëngbe Utabnabe catšata.

20 Bëngbe Bëtsá šontsonýá, ntšamo tšëngaftanga cbontsëtsëtsnacá ndegombre bëtsemnana.

21 Jerusalenocana sënjëftsanbocnentsana, Siria y Cilicia luarëngoye sënjána.

22 Pero chë tempo, chë Jesucristbeñe ošbuáchiyënga Judea luariñe bomínýeca ndoñe quešmënjatanábuatma.

23 Nýe inýengbioye imojtsayaunana: “Nda tempo bënga puerte chamotsesufrínama enjanamá, mora entšanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe

ndoñe chamondëtsošbuáchema ca” –chënga imojtsichamo.

²⁴ Y entsanga Bëngbe Bëtsá imojtsatschuanaye, ndayá cha atšbiajana tojanmama.

2

Chë inÿe ichmónënga tmojánayana Pablo aíñe tšabá yojtsama ca

¹ Jerusalemoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše.

² Choye sënjána, choye jama šojamnama Bëngbe Bëtsá šonjaninÿanyéyeca. Atše nÿe chë Jesucristbeñe ošbuáchiyëngbiama uámanënga imojamnëngaftaca sënjanencuentá, ínÿengaftaca ndoñe; y chë tšabe noticiëngama chë ndoñe judiëngbeñe sëndabuayiynama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nÿe bonamente yonjamnama.

³ Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinÿnama.

⁴ Chca tonjanopasá, masque ínÿenga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë

Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatsëmbcá, mo chë ošbuáchiyëngbiama bacna soyënga jamama cuafseitëmena cuenta. Chënga tmojánabo jtsetatsëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cányiñe mo canyáca jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nyëts tempo mandánënga chamotsiyenama.

⁵ Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nyëts tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanyëngbiama entsanga monjánichamo chë uánatsanënga imojamna ca (ndayá chënga tempo imojamna atšbiamana ndoñe quenatámana; Bëngbe Bëtsabiamana nyëtscanga cachcá monduámana), chëngna tondaye chešmatanbuayená, ntšamo tempo tijanmama inyëtsá chaimama.

⁷ Masha, chënga tmonjántatsëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntsabuáchema, ntšamo judiënga jábuayenama cachcá Pédrëbioye tbojanëntsabuachecá.

⁸ Er Bëngbe Bëtsá atše chabe ichmoná šonjانبema, ndoñe judiënga chabiamana jábuayenama, ntšamo cachá Pédrëbioye chabe ichmoná tbojanbemcá, judiënga chabiamana

jábuayenama.

⁹ Santiago, Pedro y Juan, chë ošbuachiyënguentsä uánatsanënga, atše canye bëts trabajo chaitsebomnama Bëngbe Bëtsá tojanmama tmonjántatsëmbona ora, cucuatše šontanatsataye atše y Bernabébioye, jinÿinÿiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiynayama trabajo jamama, y chëngna judiëngbeñe.

¹⁰ Chënga nÿe šonjanaimpádaye chë ošbuáchiyënga ndbomnjémënga Jerusaleno-quëngbiamama jtsenójuabnayama; y atše bëts cá sëntsama chënga jujabuáchama.

Pablo Antioquioca Pédrëbiamama tojánayana chandoñe tšabá tojanmama ca

¹¹ Pero Pedro Antioquía bëts puebloye tonjánabo ora, chabe delante sënjánayana chandoñe tšabá tonjanmama ca, er ntšamo enjanamcá ndoñe tšabá quenjatsmëna.

¹² Mëntsá tonjanopasá: Santiago básefta entšanga Antioquiocyte tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanmama, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnama yojánamna ca tmojánayanënga, chabiamama muanjájuaoyama yojtsauatja causa.

13 Chë inÿe judiënga ošbuachiyëngnaca tmojanontšë amana cachcá ntšamo Pedro yojtsamcá, jtsamëse ntšamo chënga imojántatsëmbo chca jamama ndoñe yonjanamncá. Y Bernabénaca, ntšamo chënga imojtsamcá jtsónÿayëse, chëngcá yojtsama, jtsamëse ntšamo cha yojántatsëmbo chca jamama ndoñe ibonjamncá.

14 Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninÿe ora, Pédrëbioye nÿetsca ošbuáchiyëngbe delante sënjaniyana: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

15 Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmncá, chë “bacna soye amënga ca”, ndoñe queftsátsmëna.

16 Y bënga mondëtatšëmbo, canÿe entšá Jesucristbeñe tojtsošbuáchema, Bëngbe Bëtsá jamana cha chabe bominiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiñe tšábenga chamotsemnama, pero ndoñe ntšamo chë judiëngbe leyënguiñe jamama

yomna ca iuayancá bēnga tmojamama. Er Bēngbe Bētsá ndocna ora ntjamana canye entśá chabe bominyiñe tśabia chaotsemnama, ntśamo chē judiēngbe leyēnguiñe iuayancá jamama ibomna ca cha tojamama.

¹⁷ Pero, bēnga bētsá mondēnguá, Bēngbe Bētsá chaomama bēnga chabe bominyiñe tśábenga chamotsemnama, bēnga Crísoftaca cányiñe mo canyáca jtsemnēse, chábeñe imošbuáchema. Chca mondošbuaché, bēnga chē bacna soyēngama perdonánēnga chamotsemnama. Pero inye entśanga jtsichámuana bēnga bacna soyēnga amēnga imomna ca, ntśamo chē Moisesbe leyiñe iuayancá ndoñe montsama causa. ¿Y chca, Cristo bacna soye amēnga šuabiamná ca nántsayana? ¡Ndoñe, ndegombre ndoñe!

¹⁸ Atše, ntśamo Bēngbe Bētsá šojaninyinýecá, chē šojtsemna jájbanama soyēnga, cachiñe jajuaboyama y jamama stētontšese, mo chē Moisesbe ley jtsocumplínana perdonánēnga jtsemnama, atše stsemna mo nda ndayá cachá tojtsendbema y cachiñe tojtětsjebuanacá; y ndegombre, atše stsemna canya ntśamo ndoñe tśabá yondmēncá amá.

¹⁹ Chē judiēngbe leyēngaca atše sēndětatsēmbo, ntśamo chē leyēnguiñe iuayancá stsamēse, Bēngbe Bētsá ndoñe yochanjama atše chabe bominyiñe tśabia chaitsemnama; y chca, atše jtsemnana mo obanacá chē castígoca, er chē leyentša mandēnga stsamēse, ndoñe quetsátobena atsboaná jtsemnama. Chē léyeca ndoñe más mandaná ntsemnama jtsebošese, atše cachcá chē

ley sēnjanonýá, Jesucristbeñe jtsošbuáchiyama; y chca, atše chaitsobena jtsiyenana Bēngbe Bētsá jtseservénese. Atše Crísoftaca cánýiñe mo canýacá sēndménayeca, Cristo cruciñe tojanóbana ora enjamna mo átšnaca cuafjobancá;

²⁰ y mora entsemna mo nýe atše ya ndoñe cuaftsiyencá, Cristo becá vida atšbe ainaniñe entsebómnyeca. Y ntšamo mora atše vida sēntsebomncá, entsemna atše chē Bēngbe Bētsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýá y atšbe tšabiamna tojanóbana.

²¹ Atše ndoñe quetsatábotena ntšamo Bēngbe Bētsá entsangbe tšabiamna juabna yobomncá. Nderado Bēngbe Bētsá tojama canýe entšá chabe bominyiñe tšabia chaotsemnana, ntšamo chē leyiñe jamama yomna ca iuayancá cha tojtsamama, as Cristo nýe tondayama matēnjanóbana.

3

Leyjtsobedecénese o Jesucristbeñe jtsošbuáchiyese

¹ ¡Tšēngaftanga Galacientša entsanga, yapa ndenójuabnayēnga! Entsemna mo nda tcmo-jtsabocjuanacá, tšēngaftangbe juabna tojtsetrocá. Ndoñe quešnátēsertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana.

² Atše sēntseboše nýe canýe soye atše chašmēyana: ¿Uámana Espíritu tšēngaftangbe ainaniñe tojánamashēngo jtsemándayama,

tšëngaftanga ntšamo chë leyíñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema?

³ ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nýe entšangbe juabnëngaca jtsiyenëse?

⁴ ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna.

⁵ Bëngbe Bëtsá, chë Uámana Espíritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyíñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrenguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bom-inýiñe tšabia yojamna ca.”

⁷ Chíyeca tšëngaftanga cmontsamna jtsetatsëmbuana, Bëngbe Bëtsábeñe ošbuáchiyënga mondmëna mo Abrahábentšana entšangcá, cachcá ošbuáchiyana bëtsebomnama, chë chábentšana ndegombre entšangbiama más.

⁸ Bëngbe Bëtsabe uabemana palabrenguiñe

endopodena jualíama, Bëngbe Bëtsá yochjanma chë ndoñe judiënga chabe bominyiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acbeyeca, atše chanjama nyetsca quem luarentša entsanga tšabe bendicionënga chamotsebomnama ca.”

9 Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiana tšabe soyënga tojanmcá.

10 Chë Bëngbe Bëtsá chabe bominyiñe tšábenga yochjábiama ca juabnayënga, ntšamo leyiñe jamama yomna ca iuayancá lempe tmojtsobedecénama, chënga nyets tempo jtsiyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguiñe iuabemancá ca.”

11 Ndegombre, puerte tšabá entsinjinýena, Bëngbe Bëtsá ndoñe yochanjama ndocná chabe bominyiñe tšabia chaotsemnama, ntšamo chë leyiñe jamama ibomna ca iuayancá tojtsobedecënëse. Chca ndegombre endmëna, er Bëngbe Bëtsabe uabemana palabrënguiñe mëntšá endayana: “Nyë ndabiana Bëngbe Bëtsá

tojama chabe bominyiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.”

12 Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntšamo chë leyënguiñe endayancá, tšabe vida echántsebomna, nyets tempo chë leyëngaca mandaná ca.”

13 Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebomna, nda canye niñësiñe tmojajonyá chaóbanama cha ca.”

14 Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámioye tbojanšbuachenacá, ndoñe judiëngnaca chamotsebomnama, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháuamashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócama

15 Jesucristbeyeca catšátanga, chë ndayá sentsichamcá endmëna ntšamo nyets tempo entšángbeñe endbetsopasancá. Uta entsata tbojenoyeuná canye trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemëse, ndocná inya más ntsoybenana jayanana ntšamo tbojentratacá ndoñe yontsoservenca; y inye soyënga chiñe jacjayama cach ndoñe.

16 Chcasna, Bëngbe Bëtsá ba soye Abrahámbyoye tbojanšbuachená puerte tsabe bendicionënga chabiama jamama, y chabe entšanguentsana canyabiámnaca. Y Bëngbe Bëtsabe uabemana palabrenguiñe ndoñe quenátayana: “chabe entšanguentsëngbiámnaca ca”, mo Bëngbe Bëtsá ba entšangbiama cuaftsichamcá; sinó mëntsá endayana: “acbe entšanguentsana canyabiama ca”. Y chca entsayana, nye canye entsá ca; y cha endmëna Cristo.

17 Atše ndayá mëntsá cbontsëtsëtsná: Natsana, Bëngbe Bëtsá Abrahánoftaca canye trato tojánbema, y tbojanियana “aíñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšine chë leyënga tbojanántšaboshjona; chíyeca, chë leyënga ndoñe ntsoybenana jamana chë Bëngbe Bëtsá Abrahánoftaca tojánbema trato ndoñe chaondëtsoservënama, ni jamana ndayá Bëngbe Bëtsá tojanšbuachenacá ndoñe chaondëtsoservënama.

18 Er ndayá Bëngbe Bëtsá chabe entsanga tojatsatacá, tojtsemna chënga ntšamo chë leyine jamama yomna ca iuayancá tmojtsamama, chca,

chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiana tojanma.

¹⁹ Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahámioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinÿanyiyama ndayá tšabá o ndoñe tšabá jamama bétsemnama, chë Abrahámbentšana Uámana Entšá jashjanguëntscuana, ndabiama Bëngbe Bëtsá Abrahámioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšinë tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entšángaftaca.

²⁰ Uta entšata canÿe trato jénbemamna, jtseytana inÿe entšá chë uta entšátaftaca chaóyebuambama; pero Bëngbe Bëtsá Abrahámioye ba tšabe soyënga jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiama Abrahánoftaca chaóyebuambama.

Ndayama chë ley yomna

²¹ ¿Chca nántsayana, ntšamo Moisesbe leyinë iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšinë canÿe ley tojanáboshjona, y chë

ley tojt sobena jamana entšanga ndegombre tšabe vida chamotse bomnana, as Bëngbe Bëtsá nanjama entšanga chabe bominyiñe tšábenga chamotse mnana, ntšamo chë leyiñe jamama yomna ca iuayancá tmojtsamama.

²² Pero Bëngbe Bëtsabe uabemana palabrënguñe endayana, nyetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtse bomna ndayá Bëngbe Bëtsá tojanašebuachenacá.

²³ Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinñanñiyama tempo joshjanguëntscuana.

²⁴ Cristo jabama tempo tonjanoshjanguëntscuana, chë ley bëngbiama enjamna mo canye pamillentša oservernacá, cha jtsamana chentša básënga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tšábenga chamotse mnana.

²⁵ Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entšacá, ndayá tšabá yomncá bënga chamotsamama

cuaftsamcá.

²⁶ Cristo Jesúsbeñe šmojtsošbuáchema, nyetsca tšëngaftanga šmojobená Bëngbe Bëtsabe básenga jtsemnana, Cristo Jesúsëftaca cánýiñe mo canýacá jtsemnëse.

²⁷ Tšëngaftanga tcmónjanëbaye, y chca, Crísoftaca cánýiñe mo canýacá šmontsemna. Y mora šmojobená mo cach Cristcá jtsemnana.

²⁸ Chýyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nyets tempo nýe ínýabiama oservénënga y chë nýe cachëngbiama trabájayënga cachcanga, y boyabásenga y shembásëngnaca. Nyetsca tšëngaftanga mo canýacá šmondmëna, Cristo Jesúsëftaca cánýiñe mo canýacá jtsemnëse.

²⁹ Tšëngaftanga Cristbe entšanga šmondmënayeca, šmontsemna mo Abrahámëntšana entšanga cuaftsemncá; y chca, ntšamo Bëngbe Bëtsá Abrahámbyoye tbojašbuachenacá, tšëngaftanga šmochanjóyëngacñe.

4

¹ Atšnaca sëntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšëtayama tbojašbuachenacá, cha cabá mo canýe basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canýa nyets tempo nýe ínýabiama oservenacá, masque lempe ntšamo chabe taitá tbojašbuachenacá chë uaquiñabiama tojtsemna.

² Chë uaquiñá tojtsobóchantscuana, entšanga jtsemnana ndëmuanýënga ntšamo cha tbojtsa-

jabotcá jtsoinayana, y ínÿenga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana.

³ Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nÿets tempo nÿe ínÿabiamana oservenëngcá, quem luarentse imománda espiritëngaca.

⁴ Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nÿetsca entsangcá, canÿe shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse.

⁵ Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana.

⁶ Y chca, tšëngaftanga ya chabe básenga šmojtsemnana jinÿanÿiyama, Bëngbe Bëtsá chabe Uaquiñabe Espíritu tbojanichmó, nÿetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”.

⁷ Mëntsá, cada ona tšëngaftanguentšá ya ndoñe quenátsmëna mo chë nÿets tempo nÿe ínÿabiamana oservenëngcá, quem luarentse imománda espiritëngaca mandánënga, y aíñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatsatayama tojašebuachenacá cha echanjóyëngacñe.

Pablo, Galacia luaroquëngbiana ngménaca yojt-sanjuabnaye

⁸ Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nyë ínÿabiana oservenëngcá, ndoñe ndegombre diosënga mondmëna espiritëngaca mandánënga.

⁹ Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espiritënga šmojtsayaunana? Chënga ndocna obenana quemátsbomna, y nduámanënga mondmëna. ¿Ndáyeca tšëngaftanga šmojtseboše cachiñe jtsemnana mo chë nyets tempo nyë ínÿabiana oservenëngcá, chë espiritëngaca mandánënga?

¹⁰ Tšëngaftanga tša jtsejuabnayana diënguiñe, shinÿënguiñe, canÿe uatentša tempënguiñe y uatënguiñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana.

¹¹ Atše corente šontsengmena, nderado atšbe trabajo tšëngaftangbeñe tondayama tonjoservé.

¹² Jesucrístbeyeca atšbe catsátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjóbema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá.

¹³ Tšëngaftanga šmondëtatsëmbo, atše sënjanobená chë natsana soyama tšëngaftanga chë tšabe noticiënga jábuayenama, canÿe šocana šonjanontšáshjango causa.

¹⁴ Atše canÿe šocana sënjánbomna causa,

tšëngaftangbiana ndoñe paselo quenátsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá.

¹⁵ Ndayá chora tšëngaftangaftaca enjanopasancá, puerte oyejuayënga tcmonjánabiama. ¿Y mora ndayá tojopasá? Ndegombre, atše sëndétatšëmbo y sëntsobena jayanama, tšëngaftanga ndaye sóynaca atšbiana mašmënjannama. Chë más uámana šmojánbomna soyënga atšbe cucuatšinë mašmënjánboshjona, y nya mo chë bominyëngnaca masmënjánenobuchjatsëca atše jatšetayama.

¹⁶ Y morna, ¿ntšamo ndegombre yomncá cbojtsëtsësnama, atšbiana šmojtsejuabná mo tšëngaftangbe uayayá cuaftsemncá ca?

¹⁷ Chë ndoñe ndegombre soyënga buátëmbayënga montsinjinyňná mo tšëngaftangbiana ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiana ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuányëshanama.

¹⁸ Puerte tšabá endmëna atše y ingyënga chafstseboše tšëngaftangaftaca amiguënga jtsemnama, canye tšabe soye jamama tojtsemnëse; y sempre

chca chauétsemna, tšabiama tojtsemnëse, y ndoñe nÿe atše chentše tšëngaftangaftaca stsemna ora.

¹⁹ Tšëngaftanga, chë atšbiama mo atšbe basengcá šmondmënënga, Jesucristbeñe chašmošbuáchema tčbonjanëjabuácheyeca; atše cachiñe sëntsesufrina tšëngaftangbe causa, ntšamo canÿe šešona jtsebomnama ora canÿe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana.

²⁰ Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiama tsëséntinana. Atše tša šontsecochëngmena tšëngaftangbiama.

Ntšamo Agar y Sáraftaca tojanopasá

²¹ Canÿe soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyinë endayancá tacmojtsësertana?

²² Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiana nÿets tempo oservená; y chë ínÿana, cachabe shémbeñe, Sara, y mua ndocnabiama nÿets tempo oservená yonjamna.

²³ Chë chabe shembiana nÿets tempo oservenabe šešona, tojanonÿná nÿe Abraham y Agar chca chaotsemnama tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámboye tbojanšbuachenáyeca.

²⁴ Ntšamo Agar y Sara, y chatbe šešónataftaca tojanopasacá, bënga canÿe uámana soye

šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembása Agar, chë nÿets tempo nÿe ínÿabiama oservená yojamná, entsinÿinÿná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entšangbe cucuatšinë tojanáboshjona ora. Agar básenga yojtsabamna ora, chëngnaca tmojanonÿná nÿe ínÿabiama nÿets tempo oservénënga jtsemnama, y chë tratentša leyinë soyëngaca mandánënga jtsemnama tmojtsebošëngnaca jtsemnana mo nÿe ínÿabiama nÿets tempo oservenëngcá.

²⁵ Ndayá Agáraftaca tojanopasacá entsinÿinÿná chë Sinaí batsjoca tmojánbema trato, Arabia lu-arooca; y chë morsca bëts pueblo Jerusalénënaca entsinÿinÿná, er chentša entšanga montsemna chë leyëngaca mandánënga. Ntšamo Agar y chabe básenga nÿe ínÿabiama nÿets tempo oservénënga monjamncá, Jerusalemntša entšángnaca cachcá chëngcá mondmëna, chë leyëngaca nÿets tempo mandánënga bëtsemnayeca.

²⁶ Ndayá Sáraftaca tojanopasacá, chë nÿe cachabiama trabájaye shembása, entsinÿinÿná chë trato, chë tšabe bendicionënga Abrahambiana jamama chábioye tbojansbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalemntše joyénanama, y chca, ndegombre chënga mondmëna celocama entšanga.

27 Chë celoca Jerusalén endmëna chë ndegombre bëts pueblo chë Jesucristbeñe ošbuáchiyëngbiana, y chca endmëna mo canyë shembása šešonga ndabamná y aíñe chaotsabamnana Bëngbe Bëtsá cuafjamcá. Quem luarentša Jerusalén endmëna chë uamana luare chë léyeca mandánënga imomnëngbiana, y chca endmëna mo canyë shembása aíñe boyaftaquëcá, er Bëngbe Bëtsabe uabemana palabrënguiñe chë shembásatbiama mëntsá endayana:

Shembása šešonga ndabamná, y ndocna
te tsetšanënga ndbomná šešona
jtsebomnana,

moyejuá y moyó oyejuayá cojtsemnana.

Chca moma, er aca, chë shembása chabe boyabi-
ama utšená, chë shembása boyá bomnabi-
ama más básenga cochántsabamna ca.

28 Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnana, Bëngbe Bëtsá chca tojanšbuachenáyeca.

29 Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nye chata chca tbojánbošenayeca onyñaná; Isaac, chë Bëngbe Bëtsabe Espíritbeyeca onyñaná), mórñaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá.

30 Pero, ¿ndayá Bēngbe Bētsabe uabemana palabrénguine Abrahambe básatbiamana iuayana? Mēntśá endayana: “Moma, chē n̄yets tempo n̄ye ín̄yabiamana oservená y chabe basa acbe yebnentśana chábuaisebocnama, er chē n̄yets tempo n̄ye ín̄yabiamana oservenabe šešona ndoñe quenátobena chabe taitabe soyēnga jtsebomnama. N̄ye chē propio shembe šešona aíñe, er chē shemna ndoñe n̄ye ín̄yabiamana n̄yets tempo oservená quenátsmēna.”

31 Chcasna, Jesucrístbeyeca atśbe catśátanga, bēnga ndoñe quemuátsmēna mo can̄ya n̄ye ín̄yabiamana n̄yets tempo oservenabe básenga cuaftsemncá, er mora ya ndoñe más quemuátsmēna chē léyeca n̄yets tempo mandánēnga. Y aíñe montsemna mo can̄ye shema ndoñe n̄ye ín̄yabiamana n̄yets tempo oservenabe básenga cuaftsemncá, er Bēngbe Bētsabe básenga bēnga mondmēna.

5

Cristo bēnga šojatsebacá

1 Cristo bēnga šojatsebacá, ndoñe más mo chē n̄yets tempo n̄ye ín̄yabiamana oservenēngcá chamondētsiyenama, chē léyeca mandánēnga. N̄ya šmochtsentśena n̄yets tempo chca atsebácanēnga chašmoquedama, y ndoñe šmatjalesencia tśēngaftanga cachiñe chē léyeca mandánēnga ín̄yēnga chácmabiamama.

2 Tśabá šmochjouena. Atśe Pablo cbēyana: Nderado tśēngaftanga ndoñe judiēnga, šmojalesencia ín̄yēnga chē tśēngaftangbe más

delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiana tojanmcá tondayama nantsošervena.

³ Ndëmuanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana.

⁴ Ndëmuanÿenga tšëngaftangbentsana šmojtsenguá, Bëngbe Bëtsabe bominÿiñe tšábenga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šjojama Crísoftaca cánÿiñe mo canÿacá ndoñe chašmondëtsemnama; Bëngbe Bëtsábentsanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiana jtsejuabnayëse, chácmatsebacana.

⁵ Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominÿiñe tšábenga nÿets tempo chamotsemnama. Y bënga chca mondobátmana, Jesucristbeñe ošbuáchiyana bómnayeca, y chë ošbuáchiyana chë Uámana Espíritbiajana bëngbioye endobá.

⁶ Er Crísoftaca cánÿiñe mo canÿacá tmojtsemna ora, aiñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondobomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

⁷ Tšëngaftanga tšabá šmonjánama, chë jtseyenana ntšamo Bëngbe Bëtsabe ndegombre soyënga

yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama?

⁸ Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama.

⁹ Ntšamo entšanga mondëntsayancá: “Nye base levadura jamana nyetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nyetsca leyëngaca mandánënga.

¹⁰ Bënga Bëngbe Utabnáftaca cányiñe mo canyácá bétsemnayeca, atše corente sëntsetatšëmbo, ntšamo atšbe juabna yomncá tšëngaftángnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

¹¹ Y atšbiana chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye.

¹² Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

¹³ Pero tšëngaftanga, Jesucristbeyeca atšbe

catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bétsemnama, mora ndoñe šmatjátsjuabnaye šmojtsobena jalesénciana, nÿe tšëngaftangbe cuerpënga tšabá chamotsemnama juabnëngaca mandánënga jatiyenama. Chamna, tšëngaftanga šmuenbobonshánayeca, nÿetscanga šmochtsenájabuachana.

¹⁴ Er ntšamo Moisesbe leyentša nÿetsca mandënguiñe endayancá, nÿe canÿe mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.”

¹⁵ Pero ínÿenga chamotsesufrínama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsebomna. Ndóñese, nÿetscanga šmatjánenpochocaye.

Ntšamo chë Bëngbe Bëtsabe Espíritbeyeca vida jtse-bomnama

¹⁶ Chíyeca cbochjáuyana: Nÿets tempo šmochtsiyena ntšamo chë Uámana Espiritu cmojtsamëndacá, y chca, tšëngaftanga ndoñe quešmochátama soyënga, nÿe cach tšëngaftanga tšabá jtsomñama juabnëngaca.

¹⁷ Er ndayá bënga, nÿe entšangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nÿe entšangbe juábnaca jamama imobošcá contra. Chca endmënayeca, ntšamo chë Uámana Espiritu chašmomama yobošcá šmojtsamëse, ndoñe

quešmátobena jamana, ndayá cach tšëngaftanga, nÿe entsangbe juábnaca jamama šmojatsbošcá.

¹⁸ Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyíñe iuayancá játamama.

¹⁹ Ntšamo entsanga, nÿe entsangbe juábnaca tmojtsamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jésejuabnayana, yndoñe ntsoberenana cachënga jenomándama, chca soyënga jtsamëse.

²⁰ Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nÿetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnama jtsamana.

²¹ Nÿe jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

²² Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jtsiyenana, puerte uantado nÿetsca padecéniñe jtsemnana, nÿetscanga corente bonshanánaca jtsënÿayana, tšabe ainana

jtsebomnana, y nyétscañe tšabe palabra bomnënga jtsemnana,

²³ jtsejuabnayana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtsobenana. Y ndocna ley quenátsmëna, chca soyënga tmojtsama entšangbiamá contra cháuyanama.

²⁴ Jesucrístbenga imomnënga tmojama, chënga chë nÿe entšangbe juabnéngaca mandánënga ndoñe ntsemnana; ya ndoñe más, chë nÿe cachënga tšabá jtsomñama bacna juabnéngaca mandánënga quemátsmëna, y chë nÿe cachëngbiamá soyënga jamama bëtscá juabnéngaca cach ndoñe.

²⁵ Bënga ndegombre tšabe vida chamotsebomnana Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá.

²⁶ Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nÿe mochjátsboše ntšamo inÿa tojatashjachcá jatsbomnana.

6

Nÿetscanga šmochtsenájabuachana

¹ Jesucrístbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca

šmochjama becá bonshanánaca jtsonyayëse. Cuedado šmochtsebomna, er ndóñese, tšëngaftángnaca cmatjócochëngo cachcá soye jamama.

² Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³ Nderado nda tojtsejuabná, cha canye uámana entšá yomna ca, pero ndoñe chca cha tondmënëse, cachá jtsenoíngñayana.

⁴ Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse.

⁵ Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

⁶ Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntsáyancá: “Ndayá tcojajé y cachcá josháchiñana ca.”

8 Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena n̄ye cachá tšabá jtsomñama bacna juabn̄ngaca, cha echanjábocna jabuache castiganá n̄yetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo ch̄e Uámana Espiritu tojtsemadacá jtsam̄ese, ch̄e n̄yetsca tescama yomna tšabe vida echántsebomna.

9 Chcasna, ndoñe chašond̄emantšé tšabe soye jtsamama; er masque šojts̄emantšnasna, pero ch̄e tšabe soȳenga jtsamama ndoñe tmonjajbanase, can̄ye b̄ets te echanjóshjango, b̄enga b̄etscá tšabe soȳenga josháchiñama, mo tša tšabe shajuan̄enga tmojashaqūecá.

10 Ch̄iyeca, tmojtsobena ora, n̄yetscangbiana tšabe soȳenga mochjama, pero masna ch̄e Jesucrist̄beñe ošbuáchiyana bóm̄nayeca, b̄engcá B̄engbe B̄etsabe básenga imomn̄ngbiana.

Quem tsbuanácha juapochócama cach Pablo tojanábema

11 ¡šmochjin̄ye, tša b̄ets letr̄ngaca cach atšbe cucuátšeca mora cbonts̄ebuabiamná!

12 Nd̄emuan̄yenga imojtseboše, tš̄engaftanga ch̄e ndoñe judīenga jam̄endama tš̄engaftangbe más delicadentše base bobachtema t̄t̄šen̄enga chašmotsemnama, ntšamo judīenga monduamancá, ch̄enga chca jtsamana n̄ye ch̄e judīengaftaca tšabá joqūedama. Y chca jtsam̄endayana, ch̄enga chamosufrima ín̄yenga chamotsamama ndoñe mondbóseyeca; er judīenga muanjama ch̄enga chamosufrima, Cristo

cruzoca jóbanana entšangbiana puerte iuámana ca chënga tmojtsabuayiynase.

13 Pero ni mo chë más delicadentse base bobachtema tëtšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tëtšenënga chašmotsemna, chënga jtsenábotamnayama jobenayama, ínÿenga base bobachtema chacmatëtšama tšëngaftanga šmojalesenciama.

14 Atšeftacna ndocna te chca chaondopasá. Atše nÿets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentse imojuabnacá y chëngbiana puerte iuámana; y ndayá atšbiana puerte iuámana, entšangbiana tondaye quenatámana; y chë causa, atše chëngbiana mo obanacá sëndmëna.

15 Chë más delicadentse base bobachtema aíñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayëse.

16 Chë quem buatëmbana sóyeca jtsamëse šmoyenëngbiana, atše, Bëngbe Bëtsá séntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entšanga imomnëngbiámna.

17 Y mora, nÿe canÿe soye cbochjáuyana:

morscana ndocná chaondétsama atše jasúfriama chaotsemnana; er atšbe cuerpiñe endetinýna ntšamo atše tijasufri, Jesusbe oserverná bétsemnana.

¹⁸ Jesucristbeyeca atšbe catšátanga, atše séntseimpadana Běngbe Utabná Jesucristo chaoma tšabe bendicioněnga tšěngaftangbeñe chaotsemnana. Chca chaotsemna.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9